

## واويلاه يم لبنين

يولاد حيدر لأربعه من أم لبنين  
أمكم وحيدة بدارها وتعالج البين

زينة البيت ابأهله اللي ايعمرونه  
ولو سافروا بنگول باچر يحضرونه  
لكن الموتى بيتهم من يهجرونه  
مظلم يصير ومن تشوفه تدمع العين

وبدارها أم عباس بفراش المنية  
تجذب الونة ودارت عليها الرزية  
تنادي بأساميهم من الدار الخلية  
واللي احتواه الكبر يرجع وينه ووين

عباس وعبدالله وجعفر ويا عثمان  
الدار منكم خالية ضجت بالحزان  
واني وحيدة ياولادي والأجل حان  
مني خذتكم كربلا وصرتوا بعيدين

شافت خيال الأربعة في وحشة البيت  
والخامس الكرار ونادت يا علي جيت  
يا حاضر الشدات نورك يحضر الميث  
لكن ورا الكرار چنه واقف حسين

واقف يحاكيها ونحره يفيض بالدم  
يلي نصبتي بالحزن لينا الماتم  
ضحيتي بالأولاد وقلبك يوم سلم  
لله أمره وبالسعادة اليوم فزتين

واستبشرت من شافت أنوار الأئمة  
وعباس ضمها وللصدر قامت تضمه  
لكن بلا كفين ناداها ييمه  
عند البتولة بالحشر قدمي الكفين

واتشهدت والروح غابت عن جسدها  
وبجنة الله الواسعه لاكت وعدّها  
بجوارها الزهرا ووالدها وولدها  
وهناك بين احبابها قرت لها العين

الأم إذا ماتت الأولاد احضروها  
وشالوا جنازتها و حفرتها احفروها  
إلا انتي يم عباس يوم الي اگبروها  
عند الكبر ما وكفت اولاد ام لبنين

الشيخ بشار العالي